

Powšitkowne WOZJEWJENJA

njedźelu, 13. oktobra 2013

Marijanske kompozicije zaklinča w Michałskej cyrkwi

Budyski katolski tachantski chór zanjese tutu njedźelu, 13. oktobra, we 18 hodź. w Budyskej ewangelскеj Michałskej cyrkwi duchownu chórowu hudźbu pod titulom „Ave Maria“. Zaklinča marijanske kompozicije Javieta Bustoa, Jana Dismasa Zelenki, Michała Lorenca, Arva Pärta a Wolfganga Amadeusa Mozarta. Spěwni solisća su Romy Petrick, Tanja Donatec, Frank Blümel a Clemens Heidrich. Zahraje orchester Serbskeho ludoweho ansambla, na piščelach pak Feliks Brojer. Cyłkowny nawoda je Budyski tachantski kantor Friedemann Böhme.

Zetkanje putnikow

Putnicy, kotřiž su so lětsa pěši z Waršawy do Częstochowy podali, su na zetkanje do Njebjelčic na faru přeprošeni. Tute budže pjatk, 18. oktobra, po wječornej Božej mši. Kemše započnu so w 19.00 hodź.

Wobydlerska zhromadźizna dla točenja za kaolinom

Dla planowaneho točenja za kaolinom blisko Róžanta je nawoda křemjenojnych zawodow (Quarzwerke) w Frechenje, dr. Otto Hieber, Ralbičansko-Róžeńčanskeho wjesnjanostu Hubertusa Ryčerja wo to prosył, zo by w tutej naležności zwołał wobydlersku zhromadźiznu. Tuta budže wutoru, 22. oktobra, we 18.30 hodź. w Ralbičanskej čěložwučowni. Dr. Hieber je wjesnjanostu na zakładže rozmołwy pola Drježdźansko-Mišnjanskeho biskopa dr. Heinera Kocha wo to prosył. Na njej je wo ewentualne wudobywanje kaolina blisko hnadowneho městna šło. Wobdžěliłoj staj so na rozmołwje mjez druhim dekan Clemens Hrjehor z Chrósćic a Ralbičanski farar Michał Nawka. Přeprosył bě na rozmołwu, kotraž bě spočatk septembra, biskop Koch.

Kaž Hubertus Ryčer praji, póndže na wobydlerskej zhromadźiznje w Ralbicach jeničce wo planowane probowe točenje za kaolinom. Wo dalšich kročelach so hakle na zakładže jeje wuslědkow rozmyslować móže.

Zabawna hudźba w Haslowje

Serbska zabawna hudźba k připosluchanju a rejowanju zaklinči sobotu, 19. oktobra, wot 20.30 hodź. na Bizoldec žurli w Haslowje. Dožiwic móža hosćo młode serbske hudźbne skupiny Die Folksamen, JANKAHANKA a SerBeat. Wšitcy zajimcy, młodži runje tak kaž starši, su wutrobnje přeprošeni.